

UVODNA RIJEČ UREDNIKA

Poštovani čitaocē,

Obraćam ti se direktno, sa velikim „T“, u želji da ovakvim direktnim pristupom pokažem i ojačam naše već uspostavljene kolegijalne veze. Nakon 13 godina vjerujem da možemo tako. Nadam se da će ti objavljeni tekstovi u ovom broju časopisa Udruženja sudija/sudaca u Federaciji BiH „Pravo i pravda“, koji čine zbornik radova prezentiranih na XIII Savjetovanju iz krivično pravne oblasti, biti od koristi u budućem radu. Možda te, a to je želja uredništva, potaknu da napišeš i ovdje publikuješ tvoje stavove i viđenje tretirane problematike. Time bi dao dodatni doprinos kako kvalitetu časopisa, tako i pravnoj teoriji i praksi u Bosni i Hercegovini.

Ovogodišnje savjetovanje se održava u drugom terminu zbog elementarnih nepogoda koje su nas pogodile i uzrokovale probleme i u radu pravosuđa. Nadamo se da to neće uticati ni na posjećenost ni na kvalitet savjetovanja koji se sa pravom očekuje. Ovogodišnje savjetovanje se organizuje pod radnim nazivom „Aktivnosti na suzbijanju organizovanog kriminala i korupcije u Bosni i Hercegovini“. Organizacioni odbor Savjetovanja je uz široku podršku pravnika koji se bave materijom krivičnog prava procijenio da je zadati okvir onaj koji je u ovom momentu najaktuelniji. Podržavamo te da na ovu temu pošalješ uredništvu časopisa tvoja razmišljanja i prijedloge, koje bi u formi članka mogli objaviti u našem narednom broju.

„Pravo i pravda“ je zamišljen upravo kao časopis, koji, osim funkcije zbornika radova sa tradicionalnog Savjetovanja za krivično pravo, treba i može biti mjesto gdje ćemo upravo mi, sudije, tužioc, advokati i drugi pravnici slobodno, otvoreno i dobronamjerno dati doprinos jačanju društva zasnovanog na pravu i pravdi publikujući ideje, prijedloge, kritike u odnosu na pravnu materiju uopšte. Takav pristup je gotovo „mantra“ uredništva, više puta ponavljena. Udruženje sudija/sudaca u Federaciji BiH i naše kolege iz drugih srodnih udruženja, kao i uredništvo žele da opstane i razvija se ovaj tvoj, moj, naš časopis kao mjesto gdje će, bez preinačenja i bilo kakve cenzure biti dobrodošla i objavljena promišljanja

kolega prvenstveno, ali ne isključivo, iz pravosudne branše na različite pravne teme.

Stoga, uobičajeno i ovaj put napominjemo da objavljeni radovi nisu podlijegali recenziji niti preinakama ili lektorisanju, izuzev nužnih tehničkih. Takav demokratski pristup primjeren nama, kao časopisu Udruženja sudija, namijenjenom upravo profesionalnoj odgovornoj publici, podrazumijeva i da autori sami lično snose punu odgovornost za izrečenu i publikovanu javnu riječ. Uredništvo časopisa i organizacioni odbor Savjetovanja u tom pravcu ne snose nikakvu odgovornost.

Uvjereni sam da će i ovaj primjerak časopisa i naše tradicionalno savjetovanje biti i ovaj put zanimljivo i uspješno kako si nas i do sada, uz sve opravdane i dobrodošle kritike, ocjenjivao. Uz želju da se i vidimo i čujemo, poštovani čitaoc, u svoje lično i u ime uredništva toplo te pozdravljamo,

Glavni i odgovorni urednik/ca

Aleksandra Martinović